

德陽縣新志卷六

建置志

寺觀

崇果寺在縣城東南隅名勝志云縣治南偏有善果寺晉
 太始中建唐名善寂寺王勃碑記謂梁武帝所建東壁
 畫二聖僧丹青未畢大啟神光以為祥異云按碑記唐
 顯慶中縣令蕭道宏奉勅重修明萬歷中僧惠祿增修
 康熙三十二年邑人捐貲復修舊志一名涌蓮山蓋城
 址下臨繇河叢林廣袤自東北遠望穹然如蓮臺之涌
 出也

德陽縣新志

卷六

寺觀

善寂寺碑文

唐王勃

若夫玉繩高曜分寶曆於皇階金榜洞開遵瓊暉於帝
 幄雖復蒼梧北望湖湘盈舜后之歌綠苻西浮江漢積
 文妃之頌未有激揚煩蔭栖妙果於香城揮發葢纏樹
 冥基於淨域則紫房丹室猶存毀宅之間朱紱瑤匡未
 出塵籠之際我國家鳳翔元氣駕黃幄而層飛龍躍太
 虛絕蒼根而上僊文皇帝以八才御歷光昇代野之榮
 文德后以十亂乘時恭贊塗山之業握仁王之寶鏡日
 月重光驅梵帝之金輪雷霆靜禋涅槃甘露承睿渥而
 霄流般若靈音雜祥風而曉引蛟臺蜃閣俄交震旦之



墟月面星毫坐照毗耶之國善寂寺者蓋舊寺之餘址
梁武帝之所建也爾其碧鷄仙宇分絕嶂於金隄石兔
遙源控長江於玉峽封畿四會龍垞舍衛之壇里閤三
分鹿野經行之地洎蒼鵝上擊銅馬交馳祇園與板蕩
之悲沙界積淪胥之痛火炎崑岳高臺與雁塔俱平水
浸天街曲岸與猴池共盡山川隱嶙空傳鷲嶺之基灌
莽蕭條非復鶯林之樹武德伊始君子道亨正皇極而
撫寰中登泰階而臨天下函關雲物更逢眞聖之朝井
絡星辰重集會昌之運雖開基撥亂訟獄知歸而繼絕
興亡經綸未暇先皇帝統業貞觀御宸奉文物於三天

布聲名於十地參羅上下充橐籥於襟懷八部神祇薦
圖書於掌握皇寶降地符昇含生無昏墊之虞法眾有
來蘇之望俄而後庭遘厲椒房穆卜六宮震恐三靈愕
眙馳瑤展幣有罄於羣宗碧劑懸針無徵於眾術帝迺
降監迴慮屏壁與球追勝迹於靈關事良緣於福地爰
紆聖綍重啟禪宮峙璇刹於將傾鎮銀繩於已絕絲綸
旣治棟宇行周坤德用寧陰儀載朗於是林衡授矩周
官銓揆日之工梓匠揮斤刺客鍊成風之巧重楹畫拱
坐出天霄複樹文閨俯臨霓宇顯慶中縣令蕭君道宏
理鉤繩於日用憑藻績於天成僊宮之妙匠可尋盧舍

之神模不墜瑠璃鶴翥曳珠網於星津繡桷蚪伸吐璿
璫於月徑綠房丹瑱綵綴晴霞紫閣青疏光含薄霧春
風瓊樹香飄席上之蘭秋水銀塘影數軒中之笑辰光
轉卉翻寶字之龍華溽露低枝蕩眞文於貝葉 童潤
色黃珉碧玉之壇海聖彌綸獅子龍王之會建靈幃於
厚夜琢飾年深懸法鼓於迷津規模歲遠時又於佛堂
東壁畫二聖僧丹青未畢大啟神光鄰玉塵之崇輝發
金龕之寶相朱軒夕朗似遊明月之宮紺宇晨融若對
流霞之闕由是岷英蜀秀攀講序以雲趨帶鸞翥鸞仰
齋庭而霧合貪機大阻淨施旁流綺羅分解佩之因軒

蓋得捐金之所靈妃翳日捨翠幄於香筵僊客停雲落
霓裳於寶地自非冲姿密契景應潛周豈能昭義祉於
氤氲動元機於肸鬻者也爰有上座宏一節竝沈研性
符隱括仁崇凝妙律於神珠肅靈椒於寶印天吳奉檝
截苦海而橫流風伯扶輪歷耶山而効駕騰燭龍於慧
炬俯鏡重昏奏鳴鳳於天歌下清羣籟摩珍在握遙臨
七寶之宮正覺爲心俯闢三乘之路湛衢鑄於忍地品
藻雞園推水砥於言河扶持象化縣令宇文某河南人
也帝隋尙書之元孫皇唐侍中之令子爾其虹旗萬里
御六氣而鵬飛霜戟千羣擁三川而鸚視帝葉皇枝之

重對越乾坤金滕石匱之功光華宇宙公上流視慶中
和毓祉見鐘鼎於南鄰奉軒裳於北闕雲姿月步下瑤
澤而追風雪羽霞翎歷珠田而矯霧芳蘭公子卽以地
業高人幽桂王孫卽以琴樽待物敘徽猷於禮樂則俎
豆縱橫談賞契於林泉則煙霞咫尺自裁聲百里揆化
雙川收武城之故事擇中牟之令典仁風易狎候丹翟
於春垌惠化難經佇青鸞於曉隊山正源之遠量嘯傲
行藏謝太傅之高風從容語默縣丞王敬衣簪舊族孝
友名家白虹絨抵鵲之光紫電蓄衝牛之氣七年高秀
拂層漢以非遙六月雄圖擊長波而未遠鄉望等少承

榮緒中區勝族門稱東別之標地接西隅之嚮嚴君平
之履道盛德家傳秦子敕之談天風流代襲咸以爲妙
圖真諦事出於無名翠琬元碑道凝於不朽弇州北跨
猶疏駮驥之名文石東區尙勒元龜之頌况乎玉衣流
慶事屬於仙幃金屋延祥福纏於梵宇爰求勝筆載紀
芳謠下官弱植少徒薄遊多暇薜蘿人事空餘江海之
心筆札神交尙有淵雲之氣相如謝病訪詩酒於臨邛
某也棲遲聽竝歌於單父羣公以道之存矣思傳紀德
之書下官以文在茲乎願展當仁之筆詞曰蜀江東漸
岷山西積月峽星橋騰金孕碧肸鬩靈兆邱墟梵迹雁

塔摧基鹿苑遺蹟肅肅黃運英英文母配乾垂慶儀坤
握矩寵照香城仁沾淨土爰光大壯聿求多祚青牛福
地白鶴禪林重扇霧做複殿雲深龕雕翠玉刹樹黃金
龜鏡夕照鳳鐸晨吟慧樓彌望化臺出沒棟列長虹窗
栖明月果脣周映蓮眸閒發雨霽猴池煙生龍窟肅穆
禪眾優游合宰方駕康衢連舟性海鷺嶺增飾鷄林潤
彩藻繪相尋丹青盡在我今懷矣窮路何之承風詠德
展義陳詞百年心事千載風期東西南北棲遲幾時
遊崇果寺懷勤正和尚
明樊鼎遇邑令

時來絕聽法雷聲古柏空傳西子情頑石已埋荒草徑

德陽縣新志

卷六

寺觀

五

靈鷲猶向鏡臺鳴白雲有意門常繞天雨無緣花不生
昔日高僧何處去滿林荆棘阻人行

山門寺在縣東三十里雍正十二年僧德雲建乾隆四十
八年僧秀成增修

中觀音堂在縣北四十里康熙五十二年里人募修

張家菴在縣西二十五里康熙中僧普佑建古名羅漢寺
三應宮在縣西二十里始建無考乾隆五十一年僧智慧
增修

玉皇觀在縣東五里鳳翥山顛相傳爲晉旌陽令許遜建
未知所據明萬歷中邑令樊鼎遇重修康熙五十一年

復建乾隆六十年增修寺中有古柏十餘株相傳以爲神樹

題玉皇閣

樊鼎遇

春早浮觴天帝宮象鸞歌舞在雲中玉樓作記仙才麗
綺席標題藻思工許令會朝闈闔近王編初謁鹿盧通
暝烟暮火飛歸蓋醉履星辰下半空

涉水登山謁帝宮塵心滌盡霧巔中坡前翠柏枝分
嶺上殘碑句琢工玉閣久頽仙境沒金身初現白雲通
隔江烟火千家靜踏月尋歸萬籟空

登玉皇閣步樊邑侯原韻

明張健

德陽縣新志

卷六

寺觀

六

亭亭突兀玉皇宮勢壓羣巒瑞靄中徑夾蒼松迷日影
崖環翠竹綴天工拂碑快讀詩才壯眺眼遙開村落通
應想紅塵飛不到只聞鐘磬繞長空

寶珠寺在縣南三十里康熙五十一年建雍正四年增修
金相寺古秦中化也亦曰秦中觀相傳秦始皇時真人韓
終采藥修煉於此遺洞猶存在縣北二十里勅建無攷
宋嘉定中道士楊師亮建韓陳二仙殿因觀中有陳希
夷題柱故竝祀之後記云國初吾祖趙公與馮公祖乃
造佛寺於洞側亡作者姓名似是明時增修之文康熙
五十年重建雍正元年僧慈雲增修道光元年僧湛曉

補修內有古椿樹六株巖字石刻譜云德陽秦中山仙人韓眾像磚洞前有宋石刻端平碑額篆秦中山韓仙像六字書法似李陽冰

秦中化記

宋王子申

德陽秦中化韓真君得道之所也真君韓眾字登真眾一作終國朝太史樂史傳及道家五符著觀中有碑磨滅不可考道士黃坤祖遊邛州鶴鳴觀探道朗諸仙錄得其傳已鏡諸石道黃坤祖之師楊師亮嘉定庚辰閒住山凡十五年建韓陳二仙殿又創二洞於殿後位三閒以居之廣庶高門像設備具既工而師亮死坤祖者

德陽縣新志

卷六

寺觀

七

商社儒家子慨念其師之志求予文記之予按蜀志岷峨炳靈地重井宿玉局青城丹景羅浮火井土壘洞天以及福地諸榮不可勝舉晉王逸少與周益州書欲以餘齡一登汶嶺峨眉爲不可得按韓眾謫仙人流與許邁爲方外之交其言豈徒發哉大抵天下名山大川所在皆有之陰陽之所旁薄山澤之氣以通上帝列仙分治以助化育亦猶唐虞之五臣四岳以總十二牧也真人事跡具於樂傳而觀中又有陳希夷題柱証及羣仙飛昇事故師亮作二仙殿以真君與希夷竝列以識其實自吾儒論之六合之外咸以耳目之所不及概曰無

以吾獨喜其徒由田閒童習出家從師便能遵服其教
知所遵尚應供得錢不爲外好所奪一力專事土木重
修鄉火起敬起信儼若真君其人可謂不殊本矣師亮
會起文昌宮於吾鄉嘗求予書秦中化及列仙洞顏今
坤祖又能推其師之初心求記以表之且曰自是繼有
作以紹其師之志是皆可書者紹定癸巳正月上日靜
遠居士王子申記朝奉郎遂寧府通判知懷安軍府事
缺應發篆缺蓋從事郎邛州司戶參軍黃頤之書

秦中觀記

明失名

秦中古蹟乃秦時真人韓終飛昇處也終曾爲始皇採

德陽縣新志

卷六

寺觀

八

藥修煉於此丹成乘白鹿上昇今遺洞尚在考之廣記
之第七秦中治上應箕水豹星神仙之說雖云渺茫然
載籍所記豈盡荒唐詭異之說哉國初吾祖馮公與趙
公祖以仙蹟所遺欲張大之乃造佛寺於洞側名曰秦
中觀厥後殿樓繼修僧徒日眾林木暢茂繁陰翳鬱遂
成勝境謂非仙靈所孕不可也但邇來風俗漸靡人心
日僞僧之恪守清規者固多其閒淫縱不檢飾行於眾
而爲非於幽獨者亦不少乃兩氏人見其不道多指摘
之而僧有病其不利者欲將祖功宗德泯而無傳於梁
閒姓字抹而塗之以爲抗眾計族人有欲訟於官者予

止之曰僧之不法固所當懲然亦有以功德上之故過
苛責之亦非也莫若為之著三戒以定僧規明二禁以
除俗弊則彼此相安可長無事矣僉曰善則善矣非鐫
之於石何以垂久因書以為記

秦中化韓終傳

附

宋黃三桂

真君韓眾不知何所出乃秦始皇時人也五符著眾字
登真隱訣作終字云此是五府之韓終也始皇謂王
二字曰盧生徐福入海不還韓終亦不報缺三字時缺

六字死缺韓終曾為始皇採藥缺六字煉丹於廣漢縣

竹縣之山中以端午日騎白鹿升天抱朴子云眾服葛

德陽縣新志

卷六

寺觀

九

蒲十三年身生毛日親書萬言皆誦之冬祖缺三字葛

蒲須得石上一寸九節者最上紫花者尤善登真君訣

云眾為霍林司命上仙神仙傳云劉根者京兆人漢成

帝時棄官入中嶽得道身生毛一二尺鬚髮皆黃能書

符縛鬼根初方入華山時見一神人乘白鹿從十餘人

皆女左右四人執綵旌之節年皆十五六余再拜稽首

乞一言神人乃住告曰汝聞韓眾乎余答曰實聞有此

仙神人曰是即我也余乃自陳少好養生之道而不遇

明師頗得方書按而行之事皆不驗豈根緣薄不可

世耶今日有幸得遇大神是根夙夜想所願見乞矜哀

賜受要訣神人猶未卽見告予乃流涕自搏重從詣乞
神人曰坐吾將告汝汝有仙骨故宜仙凡人髓不滿血
不旺氣少腦減筋隱肉多故服藥雖勤未得其力必欲
長生且先治病十二年皆可服登仙之上藥也夫仙道
有躡雲者有道行五嶽者有食不死者有尸解乃超者
要之在於服藥藥有上下故效有數品不知房中之事
行氣導引而不得神藥亦不能仙也藥之上者爲九轉
還丹太乙金液丹服之立便登天不俟日月矣其次雲
母雄黃之屬久服能使乘雲駕龍亦可以役使鬼神變
化長生若乃草木之藥惟能治病補虛駐年返白斷穀

裕體不能使人不死也高可數百歲下才全其所稟而
已不足賴也余乃頓首曰今日授教乃天也神人曰必
欲長生先去三尸三尸去則志氣定嗜慾除乃仙神人
以神方五篇見授云三尸常以月望晦朔日上天白人
善惡命奪人算使人不壽人身中神欲使人長生而三
尸欲使人必死則神散退還無形之中而以成鬼神之
烹殺祭祀以歆享之恐利於人之死也人之不能長生
皆神與尸戰也根乃從次合作服之遂得仙矣海陵仙
君樂子長真人於霍林遇韓終終嘗授靈妙符并傳赤
缺散方仙人告曰

缺九字

此藥老翁成童能升雲上下

改人形容益氣澄精起死養生汝能行之可以度世仙
居服之年百八十歲色如少女妻子丸人服之老者轉
少少者不老乃登缺盛山仙去又有沈文泰者九疑人
亦得眾神丹去蟲符還年之道也王子年拾遺記云陰
河之北紫桂成林其實如棗羣仙餌焉韓終嘗有詩曰
閻河之桂實大如棗得而食之後天而老洞冥記云塗
山之北有玉葉李色如碧玉數十年一生子味酸昔韓
終嘗得餌此李秦王子嬰投趙高於井中七日不死更
以火亦七日不死乃戮之王問獄吏高其神乎曰初囚
高時見高懷一青丸大如雀時方士說云高先世受韓

終丹法冬日坐寒冰夏日卧爐上不覺寒熱高死於長
安外五達之路見一青雀從高尸中出飛入雲中九轉
之驗信於是乎漢惠帝二年時有道士韓稚卽終之嗣
也按海缺二字云是東海使聞聖德洽於區宇故悅服

而來時有泥離國來朝其人長四尺角如鬣牙出於脣
從乳以來有靈毛自蔽居於深穴壽不可測帝令韓稚
悉其國之語問人壽幾何經見幾代答曰五運相承遞
死遞生如微塵細雨不可論算問女媧以前可得聞乎
對曰蛇身以上八風均四時序不以威悅攬之弗濁又
問燧人以前答曰鑽火變腥以來父老而慈子壽而孝

自羲軒而後屑屑焉第相誅戮浮靡澆蕩淫於逸遊於樂世德澆訛淳風墜矣稚以達聞帝曰遐哉杳昧非通神達理者難可語斯也稚於斯而退莫知所之帝使諸方士立仙壇於長安城名曰祠韓館俗云司寒之神者誤也按春秋傳以享司寒其音亂也定是祠韓館也玉清秘錄云洞真墟在長沙縣西韓終所治之處降生臺記云侯道華陝州茂城人少時採藥中條山道靖院事周悟仙缺五字之十年不食五穀至大中四年五月二十一日沐浴更衣於五更初向殿之西南角登長松昇天繫其缺於樹上下有案止畱香缺雙履而已後語人

曰吾往山中遇韓君與我遊至去年七月蒙韓君改姓李名芝接黃庭三十五章云缺三字死昧乃爲內芝配

住太清宮善信院山中無韓君而中條山有韓眾眾乃古之列仙與淮南王遊者侯真遇之遂得道先周君而仙去神仙傳列仙傳諸仙傳仙傳拾遺竝無韓君之傳今採拾事迹爲傳於石端平乙未仲春且日本化道士澄寂知微大師前鶴鳴缺化住持黃坤祖立石

延祚寺在縣西北四十里孝泉鎮姜孝子祠右初始無攷宋崇寧中賜名孝感廟元末殘於兵燹明洪武中僧證冲重修成化八年僧明湛增修

國朝隨時修葺香火繁盛爲一邑之冠

重理佛祠兼德宇記

明黃鍾

德陽去縣治西北四十里許有佛祠曰延祚禪寺左有聖塔塔之側東漢孝子姜詩故宅遺址詩字仕遊廣漢雒縣人也妻龐氏夫婦純於孝行感宅湧泉漢永平中以孝廉聞舉江陽令卒於官故宅立祠尙相建寺居僧以奉祀焉迨唐昌黎韓公吊謁詩石尙存至宋崇寧中進士馬成輔以泉之灌溉澤及生民崇德報功宜庸惇典率諸父老奏請勅賜孝感廟額諡以王爵刻之碑碣元末寺宇旌銘殘於兵燹文不可徵十有八年賴我國

德陽縣新志

卷六

寺觀

三

朝啟運洪武戊寅成都僧綱證沖致歸本寺慨見殿廊傾廢偶相荒頽爰據古跡鼎修覺皇天王金剛聖殿各三間與善士冉覺宗重立孝子神祠一所規模宏偉階陛維新繪塑聖容儀制初備永樂正統天順首僧智澄繼然明堅焚獻逾時塔顛雨漏廟壁苔侵功力難施乏人修補成化壬辰今之住持智雲智福本師明湛曩日扶筇遊登勝地一旦目擊遂畱心以修治焉偕功德主沈曰俊曰洪曰乾鄉耆蔡鑑蔡洪等捐貲協力循序經營首建神祠次嚴聖塔佛殿之東西環置法堂寢室以侯冠帶之巡遊聖塔之左隅增修藏經樓用貯琅函之

約束廳廚廊廡曲檻飛簷丹碧輝煌煥然新美成化丙午前監察御史吳侯淑謫縣作郡勸農因謁神祠令僧賦役宏治庚戌師湛順寂法嗣雲福克遵成憲不愆不忘乃曰前人往矣事業成矣不原之於始罔知先哲繼緒之爲難弗要之於終未覺後嗣守成之不易咨之僧友智定繼澄輸帑構材於聖塔後建亭樹碑以誌之焉茲因落成請筆於石予曰行之大者莫踰於繼志述事今雲福不大承裕後不惟孝子姜詩清風之愈揚而唐宋諸公藻翰之愈烈先師功業光大而澄澈竟可謂善繼志善述事者矣千載而下得無人乎吾知觀其記而

興起者追禪前烈奚但如是而已哉佛言捨施定澄喜出於心亦可爲佛之後裔而無忝矣因爲記焉戮力善士名俱勒之碑陰時大明成化十三年歲在戊寅冬十二月上吉日 按序中有唐昌黎韓公弔謁詩石語舊志金石竟作韓昌黎然退之生平未嘗至蜀何由弔謁及觀藝文有昌茶韓份詩一首若以四字爲人姓名者久乃悟茶爲黎字之誤但未攷份爲何時人耳成化無戊寅十三年乃丁酉也正德十三年實爲戊寅敘言已在宏治之後碑字漫滅抄寫誤也

梅泉寺在縣東十五里天宮堂下刼始無攷宋淳熙元年

重修明初僧智真相繼補葺僧慧定重建

重修梅泉寺記

明宋繼祖

梅泉寺古梵刹也去邑十五里東倚接漢華峯西面石亭秋月北聯馬山春早南底湧泉僊跡砮巒秀麗泉沸清漣偉哉吾蜀形勝之地也其寺之建莫窮其始惟泉側有古碑一通拭視之刻云宋淳熙元年甲子僧守訥重修梅泉寺以此推之則此寺之建肇自漢唐佛入中原之初也明矣迨夫有宋南渡兵燹勢亂屢遭干戈之變殿堂門廡蕩爲煨燼雖僧房之猶有存者亦無幾矣國朝至今寺僧智全號寶珠智悟號真空法用號大機

德陽縣新志

卷六

寺觀

七

者相繼補葺漸次恢復然閒架低小規模狹陋足以蔽風雨容僧眾而已若夫崇佛教壯奇觀延賓客垂永久則未也比來住持僧惠定號蘊空者操心瑩潔志行端方人多敬重之雖名士大夫亦與之交遊不絕是以芳譽日隆而郡邑之士夫君子欲遊觀而戾止者咸以此境爲最蘊空禮遇閒恆以殿制卑陋弗克改觀爲媿耿耿之懷積之數年有不能自己者遂偕徒法容法德法才苦積貲財廣求木植遴選名工於乙卯年二月建覺皇正殿三閒傍聯禪房三閒設卧榻於內以便晨昏憩息殿中裝塑金像三尊壅壁四圍繪以三教及五十三

參二十四位諸天神像柱列童子四位上懸天花板五
山門相對映以窗櫺朱漆以至焚香有鼎陳茗有案不
一歲而大功倏就加以壬寅年所鑄鐘磬雲板環列左
右而是寺之規模煥然一新自是而祝壽有所說法有
堂參禪演教無往不裕非復曩者狼狽樸陋之可言矣
後此而佛教愈尊僧眾愈廣氣勢愈昌豈非今日重修
之力與迄今落成五載以世遠無識爲怖囑隆聖寺僧
淨興號古道者持禮請予爲文以記予仰而嘆曰天下
之事莫大於營建而營建之急莫先於貨財蘊空不持
一疏不操一鉢不煽一財而大功刻期就成雖一瓦一

石一灰一竹之微悉捐已財易之其視他僧之假佛法
以惑愚民托營繕而規財利者殆霄壤之不侔矣僧中
有人若此亦僧中之賢傑偉人也予雖不能文然亦不
敢沒蘊空之善因秉筆以紀其事之顛末用勒於石以
垂不朽云爾

金鷄寺在縣北三十里剏建無攷舊惟基礎古鐘尙存雍
正中重建乾隆初里人募捐增修

重修金鷄寺記

國朝 馬希尙 成周

縣治之北離城三十里許有寺名金鷄不知始何義也
舊有古刹爲居民接福迎祥所自明末兵燹後棟宇摧

顏教像傾圮其存而可稽者僅基石古鐘而已矣癸卯歲余舌耕於斯見其山水清奇林麓幽邃輒不勝今昔蕭條之感時有住持寂法又以工費爲苦及秋里人有樂施者吾兄賢遂爲之總募鳩工補葺大殿五楹雖未能復其舊制而春花秋月文人達士之往來者得以觀覽肆志焉越己酉予以拙才見擢匏繫東魯此時雖欲睹林閒之樂以快賞於斯不可卽得乾隆癸亥有客自蜀來告予以吾鄉人復將斯刹左右下增修七楹雕梁畫柱玉鏤金几鼓鐘法器較諸前此之創建而大備且索余以屬記焉論者或以爲勞人工興木石是乃無益

之舉余謂不然夫民之爲道也利則趨之害則避之見福則喜遇禍則憂其端皆起於善惡之分第無所擊觸則頽然自阻焉耳如是觀之建非徒曰佛可敬也釋所棲也而藉之以明禍福利害之理爲善去惡之道耳夫民不知爲善聞善降祥無不踴躍以爭先不知去惡聞惡受殃羣焉恐懼而思退一舉而懲勸之意寓焉其有關於人心世道者又曷有窮乎余不敏姑述其畧以誌俾後之登斯地者咸知所觀感而功績垂諸不朽云

明本禪師廟在縣東四十里欽螺山舊名炳靈宮嘉慶十四年建

歛螺山新修明本禪師廟碑記

廖家驕冀亭

禪師明本蜀之廣漢僧也據舊碑所載生於明永樂五年以天順五年涅槃於什邑之鑿華山茶毘之日金色光明舍利堅固大衆瞻仰爲建塔以奉之自明迄今遠近之進香於其山者相屬不絕也第其山勢阻峻草木蒨翳攀藤援葛僅而得上蛇虺之所窟宅虎狼之所潛藏行者惴惴動魄驚心又近西苦寒一涉秋冬嚴霜積雪路閉不通是以皈依者每以歡喜心變怖畏想我

皇上即位之十有四年時和年豐民安物阜邑無待舉之事野

無廢業之民於是邑中父老感道力之宏深念遺蹟之

德陽縣新志

卷六

寺觀

六

所在而倡於眾曰明本禪師爲蜀中人所崇信久矣而膜拜者經歷險遠甚非所宜夫佛法廣大慈悲無所不現况凱江之西旌陽之東有歛螺山者師昔結茅於此曷建廟茲山使瞻禮者得以就焉一時聞者發菩提心有願舍給孤園者有願施佈地金者緇流素侶無人我相破慳吝爲喜捨期年之間梵宮紺宇鼎建巍峩鷲嶺福田近在樂國首其事者嘉眾善之樂施而喜厥功之有成也丐余爲文以紀之余謂佛教虛無儒者不道而其理有未可盡非者儒者之道施於賢哲佛氏之教施於庸愚也凡人平居爲不善父兄師友教誨董勸或悍

然不顧矣其次面從心違矣舉佛氏之言以怵之曰子獨不畏冥誅乎獨不爲來生計乎則悚然而動中夜爲之不寧矣且三尺之法嚴而難犯也桁楊刀鋸之威非不森然可畏也而黠者昧理喪心能巧避於法之外以盡其無情之辭及夫入釋氏之山門指土末以爲證則面赤顏赧舌橋然而不能下似佛之靈爽有以先懾其心也故曰佛氏之教施於庸愚也今夫恣口腹以傷生者造孽山之崑崙也縱情欲以戕性者沈慾海之波濤也孽山慾海之中其如恆河沙數終其身入而不出迷而忘返者是皆然矣至將入廟禮佛必先期齋戒蠲潔

其身數日而後敢往則此數日中固已能使人離孽山而脫慾海矣以視夫入而不出迷而忘返者不猶有閒乎又何得盡以爲非也禪師明本得佛氏三昧者也人之崇而事之也亦如佛故爲舉佛教之有益於庸愚者以爲記若其精修之始末與其靈異所著見及山之形勝與廟貌之莊嚴是皆心所未信而目所未經者故畧而弗道

上觀音堂在縣北六十里乾隆十年建

尖山寺在縣東二十五里尖山始建未詳

潘家寺在縣南二十里康熙四十八年建乾隆三十五年

僧玉山增修寺有古鐘則亦前明舊址也

傅家寺在縣西二十四里明嘉靖二十一年建康熙四十年增修內有古碑俗呼三進士碑舊志云前明邑進士朱屏撰文劉洪範書丹陳希簡篆額今碑已殘破寺僧嵌於佛座然明有周洪範劉希簡俱漢州進士此作劉陳併朱屏俱云邑進士未詳恐亦鄉人之無知妄作也

關聖廟在縣西十八里明宏治十六年建康熙二十七年重修嘉慶十年增修有鐘一口載宏治年鑄

下觀音堂在縣西四十里康熙中建嘉慶十二年僧源洪

德陽縣志

卷六

寺觀

三

增修

太平寺在縣北十五里鳳凰山明萬歷三十八年建康熙三十五年僧道性增修有古磬二崇禎四年鑄

九日暨同人遊太平寺

國朝

李濂

鹿頭秋欲老賞勝得其侶古寺樓巋然便作登高處小澗石橋回蘿徑山門古登堂心俱空招提絕塵土法象瞻大力貝葉吟堪數山僧亦雅客茗供香積煮黃柏併嘉蔬小摘沁人腑讌談靡不愜偶遊憶杜甫將夕尙盤桓行行月到午詠罷風愈清聞鴻江之渚

蓮池寺在縣北十里牛耳岡西雙龍山古名寶珠寺宋紹

興二年建元皇慶中補修明永樂十八年重修宏治五年增修正德十三年補修乾隆十三年重建前有蓮池故名道光十一年僧通聞增修

重修蓮池寺記

黃鍾

旌陽之北牛耳之西有梵刹今名之曰蓮池我國朝洪武初其地荆棘蕃蕪瓦礫交橫諒爲古蹟但時移世遠名實無所稽興廢無所考也永樂庚子地主周永懷延僧祖瑛翦茨闢土畧修小房數椽以安居焉宏治戊申僧歿居壞永子文明惻然乃曰祖遺聖地規畫昭然雖云時有盛衰烏可坐觀成敗於是迎請今之順寂僧成果

德陽縣新志

卷六 寺觀

三

果今之住持僧成香功相來此稍葺草菴以棲其身宏治己酉果香相等率諸徒眾歷涉縣州山宿野數年構材歸寺經營修築幸得古碑浣讀其文始知本地乃雙龍山名寶珠寺跡基於南宋紹興壬子之歲碑刻於大元仁宗皇慶之年也於茲用木鳩工苦其囊竭文明謀示諸子興祖興厚興德興旺協諮鄉耆張傑范隆等輩捐貲以補不足分粟以助不給宏治壬子初立覺皇天王法堂殿宇三重續置龍神祖師僧房東西二處僧果香相募鐵肆千觔鎔鑄毘盧一尊文明裝塑阿彌陀佛聖像僧俗共諧圓覺諸天羅漢監齋神容完具輝煌金

碧煥然一新竊憶今日之勳猷能無前時之廢墜是固可憂也敢以成功記托啟後謁予以筆之焉予乃曰業之大者固難於創始尤難於守成况前之功業光竝日星堅同金石可謂至矣繼之者無其人乎噫嘻千載而下必有振宗風續祖燄者出於其閒視今之烈必倍其光則守成者將傳至於無窮而不必憂矣是爲記焉

崇貞觀舊志云在縣北四十里仙女洞碑立於淳熙八年字蹟磨滅可識者十之一二惟存遂寧軍府事兼管山勸農事賜緋魚袋李益謙誤知象州軍州事闕內勸事江邊都巡檢使借紫金魚袋李福謙書丹住山小師王

德陽縣新志

卷六

寺觀

三

道亨賜紫黃道著住持賜紫馬昌齡立石惟碑首邑人章槩篆重修崇貞觀記六字神采飛動略無侵蝕然益謙福謙亦必里人兄弟仕宦而告歸林下者惜無可攷矣

普賢殿在縣城西街始建無考乾隆五十一年縣令富森保增修

觀音堂在縣西二十里始建無考雍正十二年監生黃啟仁施田重修

清涼寺在縣北四十里康熙四十三年僧道元建

石亭古寺在縣西二十里石亭江岸劫始無攷康熙四十

九年重建

下景寺在縣西二十里始建無考康熙中僧元照重建有古鐘一載崇禎五年鑄舊志云國初城內崇果寺鐘忽失所在後於下景寺見之人以爲飛去云

眞如寺在縣西四十里康熙二十年僧月凡建乾隆五十九年僧遠福增修

報恩寺在縣南十五里明萬歷中建乾隆二十一年僧古峰重修嘉慶十八年僧意成增修

七聖泉在縣西三十五里明宏治二年建康熙五十二年僧修內有古磬一載崇禎八年鑄三足鑪高二尺餘載

德陽縣新志

卷六 寺觀

三

成化二年鑄

白土寺在縣北五十里康熙四十六年僧躬治建

天池寺在縣北五十五里雍正十二年僧鏡堃建

靈源觀卽湧泉觀在縣北三十里乃神仙二十四化之一始建於宋乾道八年有古碑尙存

靈源觀馬明生記

宋 閻蒼舒

神仙二十四化洛北邙之外在蜀隸吾州者七又爲蜀最德陽縣北三十里有靈源觀是爲馬明生祠寒泉清冷古樹天喬亂石蹲列磈礚異狀市井煩囂之聲不接于耳眞學道者所宜處也明生本和姓字君賢齊臨淄

人爲邑小吏幾死賊手得異人藥起之乃易姓名執弟子禮從之岱宗巖石閒久逾敬示之衆獰不改色誘以媚好不一瞬塵消埃滅道根淡矣曾不知其師之爲太真夫人也夫人一日語之故謂我往矣有安期生者來舉明生相付囑明生事安期猶夫人背笈手瓢二十年與俱得太清金液丹法凡所至人多不識獨漢太傅胡廣一再見有問答後青蛇見御座及廣死率如明生指如是歷九州五百餘年人後先見者顏丹鬚漆一如也今石上實跡存焉蓋漢光和三年也

靈源觀義田記

附

宋章 槩

德陽縣新志

卷六

寺觀

三

馬明生學道湧泉今以化名靈源觀泉石秀潤竹柏蔥蒨道士楊敷本居之逾十年規模日新朋徒日蕃敷本懼廩粟之不繼也趙希明貳觀事使走鄉鄰之樂施者請焉遠近僣應歲月未幾得田百二十畝有奇通舊所闢足飽此芻嗚呼艱哉過余臨叩丐書之以久其傳或曰老子之道以無爲宗今祀老子者像貌必飭宮庭必嚴冠裾參差鐘鼓迭作一不是稱不足持其門道果在是乎然余觀諸大空蕩然寥寂一塵弗興空果何爲而日月臨照風雨晦明山川通塞于是形焉人之一身心有所欲耳目爲之導使如死灰如槁木而謂我能黜聰

廢明不累諸物彼何有於斯道出入之機哉爲之而不
有是則老子之所以爲無也道藏載二十四化其在蜀
者率頽圯不振敷本自儒而老能使其教信於吾邑敷
菑播殖共圖厥成蓋亦可與語道矣

白衣菴在縣北十五里明成化七年建康熙五十六年增
修有古鐘一

羅家菴在縣北十里乾隆五年僧心禮建

松苞寺在縣北六十里嘉慶八年里人募修

白泥菴在縣北三十五里康熙中建乾隆五年增修

王家菴在縣西三十里明成化二年建康熙三年重修

德陽縣新志

卷六 寺觀

三

蘭穆院在縣西十里始建無考雍正十三年重建有經樓
一座古桂樹二株

鹿女廟在縣西二十五里傅家營詳古蹟

大明寺在縣西三十里雍正十二年建乾隆三十四年僧
澄澈增修

余家菴在縣西三十五里古西山道觀也明成化五年勅
建改名圓覺寺宏治六年正德十二年相繼增修康熙
三十七年重修有古鐘一載崇禎八年鑄古磬二載正
德七年鑄

余家菴碑文

明范儒

圓覺寺居縣之西幾三十里善信余勝捨地所修之梵刹也自我朝景泰丙子其地林木翳鬱草莽藜藿有僧名曰覺菴遊此少憩目境清幽堪爲棲處募設蓬茅以居之遂爲開山之祖師焉始翦除荆棘次序經營每見土壤之中碎甃皆琉璃壞脊有鯨鯢詢乎父老皆云世傳爲西山道觀之故址也尙有所遺殘碑但惜文字泯滅不能稽考興廢於何代時年也成化己丑師乃傾囊備儲合用新修正殿塑肖聖容立名圓覺禪寺時因僧少力微以故廳厨莫及宏治癸丑今之住持僧智聰本師明堅克紹先烈毅然有爲殿後增修法堂中具覺皇

儀相視瞻有倚居止粗安正德丁丑聰偕其徒惠山繼承前業補綴傾頽一旦咨之曰禪林稍爲修葺矩度概有未周伊若濡滯而因循世業不能無廢墜也於是師徒協心殫力播厥成功構材建天王之聖殿集工修僧眾之廊房階級廉廡門道墻圍儼爾維新煥然全美第見豐簷濟楚不似昔日之荒略無聊也緇侶羣居非若往年之孑立也由是慶延聖壽對越甚有依歸治宰車臨迎謁雅宜其所謀可謂善始令終光前啟後無忝爲釋氏之後裔也哉吁以不貲之費立遠大之謀竭寸心之微著崇高之業將見繼子而孫百世之後慕其風采

而興起者寧能自畫而自足之耶宜請諸有司刻石記
焉時嘉靖元年歲次壬午十有二月三十日壬寅值除
吉日立

謝家菴在縣北二里乾隆六年里人募建

雲鳳寺在縣東二十里始建無攷乾隆三十八年僧通應
增修

海印寺在縣北二十五里龜勝山唐元和二年高崇文建
宋紹聖元年重建明季毀於兵火雍正八年復建嘉慶
十三年僧秀成增修道光十五年添修後殿有明曾守
身甘露詩碑古黃蓮樹三株

德陽縣新志

卷六

寺觀

七

帝君寺在縣西二十里康熙中建有古文昌像一尊因以
爲名有古鐘一載宏治十七年鑄

龍泉寺在縣北二十五里康熙中建

圓覺院在縣西十五里明萬歷二十九年建康熙四十九
年僧能學增修

中峰寺在縣東四十五里明成化十九年建康熙五十七
年僧法空增修

普陀寺在縣北五十里明成化十七年建康熙七年僧性
德增修

迴龍寺在縣東三十里古名安樂院始無攷康熙元年

僧慧堂建

觀音堂在縣北三十里始建無攷嘉慶十二年僧慧嵩增修有佛光樓一座

歇馬殿在縣南十五里雍正五年建有法華車一座俗謂之轉輪車

聖水寺古名因聖寺在縣西十五里勦始無攷明宣德元年重建乾隆四十一年僧海源增修有古井名洗眼泉千佛寺在縣南十五里康熙中里人募建雍正十二年僧正學增修舊志云康熙中土人鑿地得大鐘一載宏治十六年鑄眾移之寶峰寺扛里許堅不可動因議於原德陽縣新志

卷六

寺觀

三

處建千佛寺昇之還舉重若輕至今叩之聲音洪亮聞於數里蓋亦前明遺址也

朝陽寺古名鄧林院在縣南十五里勦始無攷康熙五十五年重建乾隆五年增修名勝志云錄略云縣東南有鄧林禪院邑人公孫輔記云吾鄉精藍之勝鄧林爲第一其地蓋起於縣洛之左宛若秦川隴阪高下起伏北包靈龕南互旌邑直走於瑩華之東南楓栢柞柏拔地倚天蔚爲鄧林東山襟其前江水帶其中川原綺錯雲煙出沒飛鳥上下農夫耕穫樵牧往來庭戶閒皆一覽而有也故以爲從大將軍鄧芝而起是名與按公孫輔

元進士則此院宋時已有之矣然華陽國志云廣漢郡德陽縣山原肥沃有澤漁之利士女貞孝望山樂水土地易爲生事車騎將軍鄧芝雅有終焉之思後遂葬其山攷晉時德陽在今遂寧界不在此公孫所記恐亦沿流俗之譌

咸寧菴在縣西二十里雍正十二年僧智祥建

彌勒寺在縣北十里乾隆十一年僧登介募建

天竺寺在縣西四十里明成化二年建康熙中增修

高斗寺在縣西二十里始建無攷乾隆二十八年僧福達

增修

德陽縣新志 卷六 寺觀

三

上景寺在縣西二十里勅建無攷舊志云康熙三十四年

土人建寺掘地得銅鑄古佛七尊高二尺色象莊嚴現

供佛龕又掘得磬大小二上鐫萬歷十三年鑄

饒家菴在縣南五里始建無攷乾隆三十三年重建道光

十年增修

天馬寺在縣西十五里康熙八年建道光十三年增修

老君觀在縣東二十五里雍正二年建乾隆五十九年縣

令闕昌言倡募重修左有蟠龍泉右有通丹井

寶峰寺在縣南十五里乾隆九年僧宇堂建

天王寺在縣北十五里古名天花院勅建無攷康熙四十

三年僧雨梅重修道光十年僧上成募修有古黃蓮樹
一株

秦祖廟在縣北三十里盤龍山康熙三年建

皇朝寺在縣北三十里正德中建嘉慶八年增修

會生菴未詳所在

會生菴碑記

曾守身

菴名曰會生者諱之寓之皈之宗也菴昉於曾子成於

王氏諺田

缺三字

以曾子不居故諱之以眾生共習故

寓之又以不

缺

衷之大雄氏游於非想天故皈之會生

原夫曾子少服章逢恒棲兜率華嚴楞伽諸烏淨土神

德陽縣新志

卷六

寺觀

三

僧等編竝列燈窗咸經鉛槧

缺

六度行裊清梵於龍宮

帶五信根浣世塵於鹿野已而花開般若上林玉蕊非

遙樹結菩提東海浮槎可托望金陵而將命遡錦水以

寧親庶矣逃禪因之修觀時則有王氏者滇南遺裔蜀

北疇眈依寶筏以馮生息香城而衛道旣披十衲願構

一檀於是以前高僧定安學淡秘藏念切真空勅紺宇於

蓮池閱貝函於海印機前棒喝子固聯白社之盟物外

衣盂阿戎動紫衣之施兼茲契合遂起道場爾會生菴

者山近閩風地連石紐左畔涌瀾江之水梵振黃潮右

方開鷄足之園利標金馬雙檣對峙獨解環流是造化

之生成有神仙之故跡名藍載啟惡土幸新閱一紀以
鳩工成萬年之龍象朱聯碧井輝煌微妙之豪金樹銀
花突兀娑婆之界懸之以水迴異狹斜望之如雲同躋
仁壽慧日與春華竝爛樹似菴林慈雲偕曉月爭妍峰
疑鷲邑度優婆塞優婆夷而超億萬劫翊斯陀含阿那
含以上十九天王鳥飛來聯鵲巢而章瑞會鳥集處合
蠶缺以栖真迦陵之咏何窮蘆荀之芬不滅跡彼漢寺
之崇白馬晉刹之表青龍時勢雖殊而會生則一者矣
嗟乎卽會卽生非生非會卽心卽佛非佛非心會者懸
智鏡於心櫺生者種慈苗於性圍自高然法炬遍照三

乘獨茂因牙遠離九惱而欲以徘徊覺路解脫一輪踈
躓迷津縱橫三昧所謂以免角之弓駕龜毛之箭用螳
螂之背負須彌之山者也然以會爲會不如以不會爲
會之爲元通以生爲生不如以不生爲生之爲實相是
以水中鴈影澈上下以飛流風裏旛形妙人天而不動
十分見解翻墮昏衢半點塵情卽沈苦海生死事大夢
覺關微飲光破顏於一花誰言易得惠能得意於三棗
邈矣難期此主人所以拳拳斯菴由之矻矻也若夫一
切眾生咸同良會不岐凡聖竝證虛空以智慧工鑿人
我山用覺悟火烹煩惱鑛超輪迴之苦趣升清淨之幽

天則佛願本宏眾心各適是又建菴普濟之意云爾

德陽縣新志

卷六 寺觀

三